

四庫全書

集部

欽定四庫全書

集部

漢魏六朝百三家集卷十九

詳校官庶吉士_臣謝恭銘

主事銜_臣徐以坤覆勘

總校官檢討_臣何思鈞

校對官編修_臣吳舒帷

謄錄監生_臣黃鑫

欽定四庫全書

漢魏六朝百三家集卷十九

漢蔡邕集

目錄

箴

衣箴

銘

黃鉞銘

東鼎銘

中鼎銘

西鼎銘

朱公叔鼎銘

胡太傅祠前銘

京兆尹樊德雲銘

樽銘

盤銘

警枕銘

碑

太尉橋公廟碑

太尉橋公碑

太傅文恭侯胡公碑

太傅胡公碑

胡公碑

太尉汝南李公碑

太尉楊公碑

司空文烈侯楊公碑

漢太尉楊公碑

文烈侯楊公碑

司空房楨碑

司空袁逢碑

荊州刺史庾侯碑

朱公叔墳前石碑

陳畱太守胡公碑

太守胡公碑

陳太丘碑

陳太丘廟碑

文範先生陳仲弓碑

郭有道林宗碑

貞節先生范史雲碑

彭城姜伯淮碑

翟先生碑

汝南周巨勝碑

處士園叔則碑

光武濟陽宮碑

王子喬碑

伯夷叔齊碑

九疑山碑

陳雷東昏庫上里社碑

瑯琊王傅蔡公碑

玄文先生李子材碑

郡掾史張玄祠堂碑

袁滿來墓碑

童幼胡根碑

真定直父碑

靈表

太傅胡公夫人靈表

司徒袁公夫人馬氏靈碑

誄

濟北相崔君夫人誄

神誥

漢交趾都尉胡公夫人黃氏神誥

哀讚

議郎胡公夫人哀讚

祝辭

宗廟祝嘏辭

九祝辭

祝社文

祖餞祝文

禊文

弔文

弔屈原文

文

篆勢

隸勢

九惟文

詩

飲馬長城窟行

答對元式詩

答卜元嗣詩

翠鳥

漢魏六朝百三家集卷十九目錄

欽定四庫全書

漢魏六朝百三家集卷十九

明 張溥 輯

漢蔡邕集

箴

衣箴

今人務在奢嚴志好美飾帛必薄細衣必輕煖或一朝之晏再三易衣私居移坐不因故服

銘

黃鉞銘

孝桓之季年鮮卑入塞盜起匈奴左部梁州叛羗逼迫
兵誅淫衍東夷高句麗嗣子百固逆謀並發三垂騷然
為國憂念西府表橋公昔在涼州柔遠能邇不煩軍師
克定及在上谷漢陽連在營郡膂力方剛明集士衆徵
拜度遼將軍始受旄鉞鉦鼓之任扞禦三垂公以吏士
頻年在外勤於奔命人馬疲羸撓鈍請且息州營橫發

之役以補困憊朝廷許之於是儲廩豐饒室罄不懸人
逸馬畜弓勁矢利而經用省息官有餘資執事無放散
之尤簿書有進入之贏治兵示威戎士踊躍旌旗耀日
金鼓雷奮守有山嶽之固攻有必克之勢羌戎授首于
西疆百固冰散于東鄰鮮卑收迹烽燧不舉眎事三年
馬不帶缺弓不受彊是用鏤石作茲鉦鉞軍鼓陳之東
階以昭公文武之勛焉銘曰

帝命將軍秉茲黃鉞威靈振耀如火之烈公之在位羣

狄斯柔齊斧罔設人士斯休

東鼎銘

維建寧三年秋八月丁丑延公于玉堂前廷乃詔曰其
以大鴻臚橋玄為司空再拜稽首以讓帝曰俞往哉三
讓然後受命公乃虔恭夙夜帝采勤施八方旁作穆穆
以對揚天子丕顯休命越在先民毗于天子罔不著其
股肱畢其思心式率天行式昭德音公亦克紹厥猷鑒
于法罔敢不法憲于誠罔敢不誠用總是羣后保乂帝

家勛在方冊民咸曰休哉惟帝念功越若來二月丁丑遷於司徒

中鼎銘

維建寧四年三月丁丑延公登于玉堂前廷乃制詔曰其以司空橋玄為司徒公拜稽首以讓帝曰俞往哉三讓然後受命公允迪厥德宣力肆勤戰戰兢兢以役帝事率夫百辟媚于天子天子曰都慎厥身修思永同寅協恭以和天衷德則昭之違則塞之回乃不敢不弼枉

乃不敢不匡股肱之事既充三事之繇允備災疇作見
乃引其責曰凡庶微不若彛倫不叙是惟臣之職祇以
疾告表越十月庚午記此

西鼎銘

維光緒元年冬十二月丁巳延公入崇德殿前乃制詔
曰其以光祿大夫玄為太尉公拜稽首曰臣聞之三讓
莫或克從臣不敢辭臣犬馬齒七十可以生可以死其
戮力開私悉心在公以盡為臣之節于時侍從陞階與

聞公之昌言者莫不惕厲如履薄冰既乃碑表百代

朱公叔鼎銘

忠文朱公名穆字公叔有殷之胄微子啓以帝乙元子
周武王封諸宋以奉成湯之祀至元子啓生公子朱其
孫氏焉後自沛遷于南陽之宛遂大於宋爵位相襲烈
祖尚書令肅宗之世守于臨淮考曰實為陳畱太守乃
及忠文克慎明德以紹服祖禰之遺風悉心臣事用媚
天子顯允其勲蹟尋綜六藝契濶馳思所以啓前惑而

覺後疑者疊疊焉雖商偃其猶病諸初舉孝廉除郎中
尚書侍郎獨念運際存亡之要乃陳五事諫謀深切退
處畎畝以察天象驗應著焉孝順晏駕賊發江淮時辟
大將軍府實掌其事用拜宛陵令非其好也遂以疾辭
復辟大將軍再拜博士高第作侍御史明司國憲以齊
百僚矯枉董直罔肯阿順以黜其位潛于郎中羣公並
表乃遷議郎登于東觀纂業前司于時冀州凶荒年饑
民匱而貪婪之徒乘之為虐錫命作牧靜其方隅乃攄

洪化奮靈武昭令德塞羣違貞良者封植殘戾者芟夷
去惡除盜無俾比而作慝用陷于非辜復徵拜議郎病
免官徵拜尚書清一以考其素正直以醇其德出納帝
命乃無不允雖龍作納言山甫喉舌靡以尚之享年六
十有四漢皇二十一世延熹六年夏四月乙巳卒于官
天子痛悼詔曰尚書朱穆立節忠亮世篤爾行虔恪機
任守成善道不幸而卒朝廷憫焉今使權謁者中郎楊
賁贈穆益州刺史印綬魂而有靈嘉其寵榮嗚呼哀哉

肆其孤用作茲寶鼎銘載休功俾後裔永用享祀以知其先之德

胡太傅祠前銘

天鑒有漢山嶽降靈於肅文恭應期誕生好是懿德秉
惠且貞爰在初服皇嘉其聲納于機密機密恪清守于
三邦三邦事寧越尹三卿百揆時序七受帝命作此元
輔左右六世靖綏土宇蠢彼羣生保賴亶叙紹跡龍夷
繼軌山甫遭國不造仍世短祚援立聖嗣得公之謨帝

曰文恭朕嘉君功為邑安樂以祐其庸登位特進千巽
羣公休命丕顯光寵克章公拜稽首是對是揚藹藹惟
公民斯攸望春秋既暮脩爾乃喪不慙是遺俾屏於皇
新廟奕奕於以蒸嘗子子孫孫承嗣無疆

京兆尹樊德雲銘

於顯哲尹誕德孔彰膺帝休命謂篤不忘爰納忠式規
悟聖皇欽崇園邑大孝允光九命車服昭示采章軒輶
四牡承祀蒸嘗多士時貢徭役永息道路孔夷民清險

棘同體諸舊兆氓蒙福惠垂無疆守以罔極

樽銘

酒以成禮弗愆以淫德將無醉過則荒沈盈而不冲古人所箴尚鑒茲器懋勗厥心

盤銘

華盤就用以享嘉賓內納其實外若玄真

警枕銘

應龍蟠蟄潛德保靈制器象物示有其形哲人降鑒居

安聞傾

碑

太尉橋公廟碑

橋氏之先出自皇帝帝葬于橋山子孫之紹基立姓者
咸以為氏漢興世以禮樂為業高祖諱仁位至大鴻臚
列名於儒林祖侍中廣川相考東萊太守公稟性貞純
幼有弘姿剛而不虐威而不猛聞仁必行睹義斯居文
以典術守以純固弱冠從政當官而行刺史周公辟舉

從事所部二千石受取有驗公糾發贓罪致之於理時有椒房桂戚之託周公累息公不為之動史魚之勁直山甫之不阿於是始形舉孝廉除郎中洛陽左尉特進潁王梁不疑為河南尹當事以對是時畏其權寵而為屈辱者多矣公不折節解印綬去辟司徒舉高第補侍御史以詔書考司隸校尉趙祁事廷尉郭貞私與公書非接使御命之宜公封書以聞貞以文章得用鬼薪公離司寇辟大將軍梁公幕府屢以救正干其隆指將軍

嘉之無言不酬又以高第補侍御史在職旬月羌戎匪
茹震驚隴漢西府舉公拜涼州刺史威名克宣凶虜革
心清風席卷至則無事車師後部阿羅多卑君相與爭
國興兵作亂公遣從事牛稱何傳舉輕騎奉辭責罪收
阿羅多卑君繫燉煌正處以聞阿羅多為王卑君侯稱
以奉使副指除侯部不動干戈揮鞭而定西域之事人
以為美談又值饑荒諸郡饑餒公開倉廩以貸救其命
主者以舊典宜先請公曰若先請民已歿廩訖乃上之

詔報曰邊穀不得妄出立擅出於是立有汲黯憂民之心後不以為常公達于事情剖斷不疑皆此類也遷齊相視民如保赤子討惡若赴水火刑明賞遂民知勸懼臨淄令賂財賊多罪正受鞠就刑沒齒無怨竟以不先請免官徵拜上谷太守民有父子俱行凶人人惡言當道曉之不止其子殺人而捕得公以其見悔辨直不舉文書以遇赦令蕃縣有帝舜廟以故事齋祠戶曹史張機有懲罰貨祠巫自託以舜命約公云不得譴公覺其

奸態收考首伏即日伏辜遷漢陽太守上邦令皇甫禎
賊罪明審收考髡鉗歿于冀市後以病去徵拜議郎司
徒長史循王惺桓帝同產以懷逆謀黜封瘞陶王以公
長於襟帶拜鉅鹿太守惺畏怖明憲檢于靜息自將作
大匠徵未到而章謗先入故轉拜議郎遂用免官徵度
遼將軍遷河南尹少府大鴻臚司徒司空託病而去悉
引衆災雖非已負公皆以自劾遜位歲餘拜尚書令時
河間相蓋升以朝廷在藩國時隣近舊恩歷河南太守

太中大夫在郡受取數億以上創毒深刻公表升貪放
狼籍不顧天罔損辱國家為上招怨當肆市朝以謝兆
民幸遇贖令罪除惡在可免升官禁錮終身沒入財賂
非法之物以充帑藏懲戒羣下連表上不納而升遷為
侍中公稱病辭徙拜光祿大夫復拜太尉如前遜位復
拜少府病不就職拜太中大夫凡所獲祿皆公府所特
表選臨難受位自九列之後乃以丕貶公紀綱張弛勇
決不回是非明作速於察機燕居從容申申夭夭和樂

寬裕愛士親仁凡見公容貌聞公聲音莫不熙怡悅懌
思樂模則來者忘歸去者願還雅性謙克不吝於利欲
雖衆子羣孫並在仕次曾無順媚一言之求身沒之日
無獲大位在百里者莫得好縣比方公孫未有若茲者
也初公為舍於舊里第卒推與其孤至於即世柩殯無
所清儉仁與之効於斯為著巍巍乎若德允世之表儀
也已公諱玄字公祖少辟孝廉辟司徒大將軍府為侍
御史牧一州典五郡出將邊營入掌機密歷三卿同三

司享年七十五光和七年夏五月甲寅以太中大夫薨
于京師朝廷所以弔贈如前傳之儀九月乙酉葬于某
所三孤故臣門人相與述公言行咨度禮制文德銘于
三鼎武功勒于鉦鉞官簿次第事之實錄書于碑陰俾
爾昆裔永有仰于碑陰云銘曰

光光烈考伊漢元公克明克哲實叡實聰如淵之浚如
嶽之嵩威壯虓虎文繁雕龍撫柔疆垂戎狄率從敷教
中夏五典攸通帝謂我后朕嘉君功命君三事時亮天

工公拜稽首翼翼惟恭左右天子祇厥勲庸庶績既熙
黎民時雍上下謐寧八方和同丕顯伊德作憲萬邦

大尉橋公碑

公諱玄字公祖梁國睢陽人也大鴻臚之曾孫廣川相
之孫東萊太守之元子也膺受純性誕有特表岐嶷而
超等總角而逸羣至於初紳高明卓異為衆傑雄其性
疾華尚朴有百折不撓臨大節而不可奪之風經藝傳
記周覽博涉瑰奇在前靡所不識當世是以服重器歸

高名州郡交請待以訪斷歷端首則義可行處爪牙而
威以布察孝廉除郎中洛陽左尉以公事去辟司徒舉
高第侍御史直道而往用光其任辟大將軍西府表拜
涼州刺史遷齊相以公事去詔書印綬即家拜上谷太
守遷漢陽太守徵拜議郎司徒長史鉅鹿太守被詔書
為將作大匠為受罰者所章拜議郎即徵拜度遼將軍
遷河南尹少府大鴻臚遂陟司空司徒託病遜位起家
拜尚書令以疾篤請拜光祿大夫後拜太尉久病自替

復為少府太中大夫春秋七十五光和七年五月甲寅
薨公性質直不憚強禦在憲臺則有盡規之忠領州郡
則有虎賁之威其拔賢如旋流討惡如霆擊每所臨向
清風先翔遠近豫震茲可謂超越衆庶彰于遠邇者已
于是故吏司徒博陵崔烈廷尉河南吳整等以為至德
在已揚之由人苟不皦述夫何考焉乃共勒嘉石永昭
芳烈遂作頌曰

赫矣橋公秉文握武內為宗幹出為藩輔在憲彈枉竟

由厥矩矱牧于涼川彼裔土爰將度遠亦用齊斧敷教
四畿旋統京宇敦茲五服衆庶是與膺踐七命翼我哲
聖登空補袞陟徒訓敬尹尉清宸熙帝之政終始為貞
典章以定遺愛在民皇哀其命立石刊銘莫遁斯聽魂
而有靈萬億其盛

太傅文恭侯胡公碑

公諱廣字伯始交趾都尉之元子也公應天淑靈履性
貞固九德咸修百行畢備遭家不造童而夙孤上奉繼

親下慈弱弟崎嶇儉約之中以盡孝友之道及至入學
從訓歷觀古今生而知之聞一覩十兼以周覽六經博
總羣議旁貫憲法通識國典年二十七察孝廉除郎中
尚書侍郎尚書左丞尚書僕射幹練機事綢繆樞極忠
亮唯允簡于帝心智畧周密冠于庶事遷濟陰太守其
為政也寬裕足以容衆和柔足以安物剛毅足以威暴
體仁足以勸俗故禁不用刑勸不用賞其下望之如日
月從之如影響思不可忘度不可革遺愛結于人心起

無窮而垂則徵拜大司農遂作司徒遷太尉以援立之
功封安樂鄉侯錄尚書事稱疾屢辭策賜就第復拜司
空功成身退俾位特進又拜太尉復以特進致命休神
又拜太尉遜位歸爵旋于舊土徵拜太中大夫尚書令
太僕太常司徒永康之初以定策元功復封前邑錄尚
書事疾病就第又授太傳入叅機衡五蹈九列七統三
事諒闇之際三據冢宰和神人于宗伯理水土于下台
訓五品于司徒耀三辰于上階光弼六世歷載三十自

漢興以來鼎臣元輔耄耄老成勲被萬方與國終始未
有若公者焉春秋八十二建寧五年三月壬戌薨于位
天子悼惜羣后傷懷詔五官中郎將任崇奉冊贈以太
傅安樂鄉侯印綬拜室家子一人郎中賜東園秘噐賜
絲帛含歛之備中謁者董詡弔祠護喪錢布賻賜率禮
有加賜諡曰文恭昭顯行迹四月丁酉塋于洛陽塋故
吏濟陰池喜感公之義率慕黃鳥之哀推尋雅意彷徨
舊土休績丕烈宜宣于此乃樹石作頌用揚德音詞曰

於皇上德懿鑠孔純大孝昭備思順履信膺期命世保
茲舊門淵泉休茂彪炳其文爰贊天機翼翼唯恭夙夜
出納紹跡虞龍賦政于外神化玄通普被汝南越用熙
雍帝曰休哉命公三事乃耀柔嘉式是百司股肱元首
庶績咸治二氣燮雍五徵來備勲格皇天澤洽后土封
建南藩受茲介祐玉藻在冕毳服艾輔駱車雕駟四牡
修扈贊事上帝祇祀宗祖陟降盈虧與時消息既明且
哲保身遺則同軌旦奭光充區域生榮死哀流統罔極

太傅胡公碑

維漢二十有一世建寧五年春三月既生魄八日壬戌
太傅安樂鄉侯胡公薨越若來四月辛酉塋我君文恭
侯於是掾太原王允鴈門畢整屬扶風曾宙潁川殷歷
等僉謂公之德也柔而不犯威而不猛文而不華實而
不朴靜而不滯動而不躁總天地之中和覽生民之上
操聰明膚敏兼質先覺涉觀憲法契闊文學睹臯陶之
闡閭探孔子之房奧然而約之以禮守之以恭寬之以

納衆汎愛多容其誘人也恂恂焉怡怡焉能使蒙惑開
析偽戾優順逸惰勤信及其創基發跡機密聖朝其知
其能夙夜惟寅以允帝命是以頻繁機極三升而不出
焉乃還譚其舊章彌綸古訓貫萬品研精微用補前臣
之所闕十年而無愆強記同乎富平周慎過于博士偶
山甫乎喉舌匹虞龍而納言唯帝命公以二郡其為政
也導人以德帥物以已敦以忠肅勵以知耻人悅其化
天樂其和士相勉于公朝民勸行于私家徽纒縈而靡

係鞭朴棄而無加洋洋乎若德豈直嚴以為威寬以為
福而已哉五作卿士七蹈相位大僕司農太傅司空各
一司徒特進各二太常太尉各三光輔六世歷載三十
有餘其致治也通水泉于潤下蓄后土于稼穡訓五品
于羣黎叅人物于區域耀三辰於渾元協大中於皇極
傳聖德於幼冲率旦奭於舊職譬彼四時功成則退在
盈思中升隆以順建封域於南土踐殊號於特進榮祚
統業垂乎來胤公自二郡及登相位凡所辟用遂至大

位者故司徒中山祝括其餘登堂閣據賦政策勲樹功
流化者蓋不可勝載唯我末臣頑蔽無聞仰慕羣賢惡
乎可及自公寢疾至于薨斃叅與嘗禱列位喪位雖庶
物戮力不愆於禮進睹墳塋几筵空設退顧堂廡音儀
永闕感悼傷懷心肝若割相與累次德行撰舉功勲刊
之于碑用慰哀思其詞曰

煥文德伊朝后應期運作漢輔嘉中興膏民庶澤洪渟
宣攸序亘地區充天宇駢高達踵遐武揚景烈垂不朽

仰邃古耀昆後

胡公碑

公諱廣字伯始南郡華容人也其先自媯姓建國南土
曰胡子春秋書焉列于諸侯公其後也考以德行純懿
官至交趾都尉公寬裕仁愛覆載博大研道知幾窮理
盡性凡聖哲之遺教文武之未墜罔有不綜年二十七
察孝廉除郎中尚書侍郎左丞尚書僕射內正機衡允
膺其職文敏暢乎庶事密靜周乎樞機帝用嘉之遷濟

陰太守公乃布愷悌宣柔嘉通神化導靈和揚惠風以
養真激清流以盪邪取忠肅于不言消奸宄於爪牙是
以君子勤禮小人知耻鞠推息於官曹刑戮廢于朝市
餘貨委于路衢餘種棲于畎畝遷汝南太守增修前業
考績既明入作司農實掌金穀之淵藪和均闢石王府
以充遂作司徒昭敷五教進作太尉宣暢渾元人倫輯
睦日月重光遭國不造帝祚無主援立孝桓以紹宗緒
用首謀定策封安樂鄉侯戶邑之數加于羣公入錄機

事聽納總已致位就第復拜司空敷土導川俾順其性
功遂身退告疾固辭乃為特進爰以休息又拜太常典
司三禮敬恭禋祀神明嘉歆永世豐年聿懷多福復拜
太尉尋申前業又以特進逍遙致位又拜太常邁疾不夷遜
位歸爵遷於舊都徵拜太中大夫延熹末年聖主革正幸
臣誅斃引公為尚書令以二千石居官委以閫外之事
釐改度量以新國家弘綱既整衮闕以補乃拜太僕車
正馬閑六駟習馴遷太常司徒成宗晏駕推建聖嗣復

封故邑與叅機密寢疾告退復拜太傅錄尚書事于時
春秋高矣繼親在堂朝夕定省不違子道旁無几杖言
不稱老居喪致哀率禮不越其接下答賓雖幼賤降等
禮從謙厚尊而彌恭勞思萬機身勤心苦雖老萊子嬰
兒其服方叔克壯其猷公旦納於台屋正考父俯而循
禮曷以尚茲夫蒸蒸至孝德本也體和履忠行極也博
聞周覽上通也勤勞王家茂功也用能七登三事篤受
介祉亮皇業于六王嘉丕績于九有窮生人之光寵享

黃耆之遐紀蹈明德以保身與福祿乎終始年八十有二建寧五年春壬戌薨于位天子悼痛贈策賜諡謚曰文恭如前傳之儀而有加焉禮也故吏司徒許詡等相與欽慕崧高蒸民之作取言時計功之則論集行跡銘諸琬琰其詞曰

伊漢元輔時惟文恭聰明叡哲思心瘁容畢力天機帝休其庸賦政於外有邈其蹤進作卿士粵登上公百揆時序五典克從萬拜黎獻共唯時雍勲烈既建爵土乃

封七被三事再作特進弘唯幼冲作傳以訓赫赫猗公
邦家之鎮澤被華夏遺愛不倫日與月與齊光並運存
榮亡顯沒而不泯

太尉汝南李公碑

公諱咸字元卓汝南西平人蓋秦將李信之後孝武大
將軍廣之胄也枝流葉布家于茲土文武繼踵世為著
姓曾祖父江夏太守伯父東郡太守公受純懿之資萃
忠清之節夙夜嚴慄孝配大舜敦詩書而悅禮樂觀天

文而察地理動與神合契叶乾行操邁伯夷德追孔父
舉孝廉除郎中光祿茂才遷衛國公相受高密令勤恤
民隱政成功簡遷徐州刺史百司震肅饗餐風靡惡直
醜正恭事法宮帝念其勤屢被榮命漁陽太守還遷度
遼將軍協德魏絳和戎綏邊徵河南尹母憂乞行服闋
奔命孝和皇帝時機密久缺百僚僉允詔拜尚書歷僕
射令納言危行不絀以公事去民神憤怒羣公薦之帝
曰俞哉徵作將作大匠大司農大鴻臚大僕射公所蒞

任憲天心以教胄激垢濁以揚清懿鏢之美昭登於上
丕顯之化宣聞于下及遷台司位太尉補袞闕叙彝倫
天人交格終始無疵雖元凱翼虞周召輔姬未之或踰
功遂身退以疾自遜求歸田里告老致任七十有六燾
平四年薨海內咨嗟莫不惻焉故吏潁川太守張溫等
相與歎曰名莫隆於不朽德莫盛于萬世銘勒顯于鐘
鼎清烈光于來裔刊石立碑德載不泯詞曰

天垂三台地建五岳降生我公應鼎之足奕世載德名

昭圖錄既文且武桓桓紹續外則折衝內則大麓惟清
惟敏品物以熙告老懸車天人靡欺曾不百齡圯我國
基人之云亡八極悼思申德作頌光寵宣流鐫紀斯石
鴻烈顯休

太尉楊公碑

公諱秉字叔節弘農華陰人其先蓋周武王之穆晉唐
叔之后也末葉以支子食邑于楊因氏焉周室既微裔
胄無緒暨漢興烈祖楊喜佐命征伐封赤泉侯嗣子業

紱冕相繼公之不考以忠寔亮弼輔存安登司徒太尉
公承夙緒世篤儒教以歐陽尚書京氏易誨授四方學
者自遠而至蓋踰三千初辟司空舉高第拜侍御史遷
豫州兖州刺史任城相徵入勸講拜太中大夫左中郎
將尚書出補右扶風留拜光祿大夫遭權嬖貴盛六年
守靜外戚火燔乃遷太僕寺卿公事絀位浹辰之間俾
位河南憤疾豪強見邁姦黨用嬰疾廢起家復拜太常
遂陟三司沙汰虛冗料簡貞實抽援表達與之同蘭芳

任鼎重從駕南巡為朝碩德然知權過於寵私富倖國
大臣苛察望變復還條表以聞啓導上怒其時所免州
牧郡守五十餘人贊戾是黜英才是列善否有章京夏
清肅在位七載年七十有四延熹八年五月丙戌薨朝
廷惜焉寵賜有加公自奉嚴敕動遵禮度量材授任當
官而行不為義絀疾是苛政益固其守厨無宿肉器不
鏤雕夙喪嬪儷妾不嬖御可謂立身無過之地正直清
儉該備者矣昔仲尼嘗垂三戒而公免焉故能匡朝盡

直獻可去奸忠佞前後聲塞宇宙非黃中純白窮達一
致其惡能立功立事數聞于下昭升于上若茲巍巍者
乎于是門人學徒相與刊石樹碑表勒鴻勲讚懿德傳
億年於戲公唯嶽靈天挺德翼赤精氣絀縕仁哲生應
台任作邦楨帝欽亮訪典刑道不惑迄有成光遐邇穆
其清

司空文烈侯楊公碑

曰漢有國師司空文烈侯楊公公唯司徒之孫太尉公

之肩子皇祖考以懿德胥及肆勤式建休勲啓洪範公
祇服弘業克丕堂構小乃不敢不慎大亦不敢不戒用
罔有擇言失行在于其躬洎在辟舉先志載言罔不攸
該乃自宰臣以從王事立功不有用辭其祿建作御史
允執國憲納于侍中在帝左右爰董武事王師孔閑羣
公以舊德碩儒道通術明宜建師保延入華光侍宴露
寢敷典誥之精旨達聖王之聰睿帝以機密齊栗常伯
劇任鮮克知臧以釐其采命公再作少府俾率其屬以

熙庶績天地作險國家丕承軍門祛禁式遏寇虐命公
再作光祿勲總其熊羆之士不貳心之臣保乂帝家巖
巖大理惟制民命命公作廷尉惟刑之恤旁施四方惟
明折獄蔽罪于憲之中亦惟三禮六樂國之元幹命公
作太常明德惟馨八音克諧神人以和永世豐年溥天
率土而衆莫外命公作司空公唯戢之翊明其政時惟
休哉惟天陰隲下民彛倫所由順序命公作司徒而敬
敷五教以親百姓父義母慈兄友弟恭子孝時惟休哉

昭教子辟雍命公作三老帝躬以祇敬遵有虞于上庠
茫茫大運垂光烈曜命公作太尉璇璣運周七精循軌
時惟休哉帝欲宣力于四方公則翼之辟道或違公則
弼之虞恭夙夜不敢荒寧用對揚天子丕顯休命天子
大簡其勲用授爵賜封侯于臨晉功成化洽景命有傾
帝乃震慟執書以泣命于左中郎將郭儀作策賜公驃
騎將軍臨晉侯印綬兼號特進謚以文烈寵命畢備而
後即世肆其孤彪敢儀古式昭銘景烈銘曰

天鑒有漢誕生元輔世作三事勲在王府乃及伊公克
光前矩悉心畢力脩其祖武化洽羣生澤霑區宇帝曰
文烈朕嘉君功為邑河渭建茲土封申備九錫以祚其
庸位此特進于異羣公昔在申呂匡佐周宣崧高作頌
大雅揚言今我文烈帝載用熙參光日月比功四時身
歿名存永世慕思

漢太尉楊公碑

公諱賜字伯猷弘農華陰人姬姓之國有楊侯者公其

後也其在漢室赤泉侯佐高丞相翼宣咸以盛德光于
前朝祖司徒考太尉繼跡宰司咸有勲烈公承家崇軌
受天醇素欽承奉構閑于伐柯烈風維變不易其趣文
藝典籍尋道入與操清行朗潛晦幽閒不答州郡之命
辟大將軍府不得已而應之遷陳倉令公乃因是行退
居廬公車特徵以病辭司空舉高第拜侍中越騎校尉
帝篤先業將問故訓公以羣公之舉進授尚書于禁中
遷少府光祿勲敬揆百事莫不時序庶尹知恤閭閻推

清列作司空地平天成陰陽不忒功遂身避託疾告退
又以光祿大夫受命司徒敬敷五品宣洽人倫燮和化
理股肱耳目之任靡不克明及至太尉四時順動三光
耀潤羣生豐遂太和交薄三作六卿五蹈三階受爵開
國應位特進非盛德休功假于天人孰能該備寵榮兼
包令錫如公之至者乎公體資明哲長於知見凡所辟
選升諸帝朝者莫非瑰才逸秀并叅諸佐惟我下流二
三小臣穢損清風愧于前人乃糾合同寮各述所審紀

公勲績刊石立銘以慰永懷銘曰

天降純嘏篤生柔嘉俾膺祖考光輔國家三業在服帝
載用和粵暨我公尤執忠貞在棟伊隆于鼎斯寧德被
宇宙華夏以清受茲介福履祚孔成為邑河渭衮冕綬
珽以佐天子祇事三靈丕顯伊德萬邦作程爰銘爰贊
式昭懿聲

文烈侯楊公碑

公諱賜字伯猷兼通五典周覽篇籍以為尚書帝王之

要政有國之大本也是以三葉相承研其精義五代之
微言王政之約綱罔不尋其端源究其條貫凜乎其見
聖人之情旨也蓋以蹈騰餘蹤思高游夏初潛山澤授
誨童冠後生賴以發袪蒙蔽文其材素者蓋不可勝數
乃由宰府遂作帝臣于時聖幼將入學羣公以公溫故
知新德宜師保乃以越騎校尉援侍華光之內帝坐已
北面以納大誨其教人善誘則恂恂焉罔不伸也引情
致喻則閭閻焉罔不釋也迄用有成緝熙光明惟帝念

功六在九卿三事勛假皇天澤充區域疆土建封申增
戶邑人臣之極位兼而有之然處豐益約九命滋恭可
謂高朗令終有始有卒者已於是門生大將軍何進等
瞻仰洙泗公喪之禮糾合朋徒稽諸典制僉以為匡弼
之功政事之實詔策之文則史臣志其詳若夫道術之
美授之方策則是門人二三小子所特貫綜敢竭不才
譔錄所審言于碑乃申頌曰

巍巍聖猷匪師不昭士子困蒙匪師不教於皇文父邈

哉伊超如玉之固如嶽之喬鑽之斯堅仰之彌高示我
顯德授我無隱正席傳道承帝之問誨茲一人萬邦作
順微微我徒實賴遺訓文武作式元勛既奮光啟爵土
垂統末胤存榮亡哀沒而不泯

司空房植碑

公言非法度不出于口行非至公不萌于心治身則伯
夷之潔也儉嗇則季文之約也盡忠則史魚之直也剛
平則山甫之勵也總茲四德式是百辟夙夜匪懈以事

一人枉絲髮樹私恩不為也討無禮當彊禦弗避也是以功隆名顯在世孤特不獲愷悌寬厚之譽享年垂老至于積世門無立車堂無宴客衣不變裁食不兼味雖易之貞厲詩之羔羊無以加也

明明在公實惟皇后誕應正德武作漢輔邪慝是仇直亭是與剛則不吐柔則不如媚茲天子以靖土宇

司空表逢碑

凡所臨君明而先覺故能教不肅而化成政不嚴而事

治其惠和也晏晏然其博大也洋洋焉信可謂兼三才而該剛柔無射于人斯矣銘曰

天鑒有漢賜茲世輔顯允厥德昭肩休序戔戔雍宮禮樂備舉穆穆天子孝敬允叙降拜屏著奉饋西序威儀聿修化溢區宇乃尹京邑總齊禁旅

荊州刺史庾侯碑

君資天地之正氣含太極之純精明潔鮮於白珪貞操厲乎寒松視鑒出于自然英風發乎天受事親以存則

行侔於魯閔結交以信則契明於黃石溫溫然弘裕虛
引落落然高風起世信荆山之良寶靈川之明珠也爰
在弱冠英風固以揚于四海矣拜為荊州刺史仗冲靜
以臨民施仁義以接物恩惠著于萬里誠信暢于殊俗
由是撫亂以治綏擾以靜帝嘉其功錫以車服方將掃
除寇逆清一宇宙廓天步之艱難寧陵夷之屯否

朱公叔墳前石碑

維漢二十一世延熹六年粵四月丁巳忠文公益州刺

史朱君名穆字公叔卒于京師其五月丙申葬于宛邑
北萬歲亭之陽舊兆域之南其孤野受顧命曰古者不
崇墳不封墓祭服雖三年無不於寢今則易之吾不取
也爾其無拘于俗無廢予誠野欽率遺意不敢有違封
墳三板不起棟宇乃作祠堂于邑中南陽舊里備器鑄
鼎銘功載德懼墳封彌久夷于平壤於是依德像緣雅
則設茲方石鎮表靈域用慰其孤罔極之懷乃申詞曰
歆惟忠文時惟朱父實天生德丕承洪緒彌綸典術允

迪聖矩好是貞厲疾彼強禦斷剛若仇柔亦不茹仍用
明夷邁難受侮帝曰休哉朕嘉乃功命汝納言肩汝祖
蹤父拜稽首翼翼惟恭篤棐不忘夙夜在公昊天不弔
降茲殒殃不遺一父俾屏我皇我皇悼心錫詔孔傷位
以益州贈之服章用刊彝器宣昭遺光子子孫孫永載
寶藏

陳畱太守胡公碑

君諱碩字季叡交趾都尉之孫太傅安鄉侯少子也其

先與楚同姓別封于胡以國為氏臻乎漢奕世載德不替舊勲君幼有嘉表克岐克嶷不見異物習與性成孝于二親養色寧意蒸蒸雍雍雖曾閔顏萊無以尚也總角入學治孟氏易歐陽尚書韓氏詩博綜古文周覽篇籍言語造次必以經綸加之行已忠儉事施順恕公體所安與衆共之驕吝不萌于內喜愠不形於外可謂無競伊人溫恭淑慎者也初以公在司徒除郎中宿衛十年遭叔父憂以疾自免州郡交辟皆不就後以大將軍

高第拜侍御史遷諫議大夫以將軍事免官舉賢良方正不詣公車建寧元年召拜議郎納忠盡規匪懈于位遷侍中虎賁中郎將是年遭疾屢上印綬詔書聽許以侍中養疾其年七月被尚書召不任應命詔使謁者劉惺齎印綬即拜陳畱太守君聞使者至加朝服拖紳使者致詔君以手自擊陳辭謝恩其明二十一日遣吏奉章報謝意氣精朗是日疾大漸刻漏未分奄忽而卒時年四十一天子憫悼詔使者王謙送葬以中牢具祠賜

錢五萬布百疋贈穀三十斛同位畢至赴弔雲集生榮
未艾沒有餘哀於是遐邇搢紳爰暨門人相與歎述君
德追痛不寘恒切情愴無不永懷行由已作名自人成
先民既邁賴茲頌聲嗟我明哲如何勿銘乃作辭曰

猗歟懿德令聞有彰祇服其訓克構克堂存思唯則文
藝丕光敦厚忠恕衆悅其良綏弱以仁不云我強爰自
登朝進退以方見幾而作如鴻之翔乃位常伯恪處左
右兼掌虎賁禁戎允理邁茲虐痼帝用悼止俾守陳留

庶篤其祉王人既詔景命不俟嗚呼昊天殲我英士如
何贖也命不自已哀哉永傷萬年是紀

太守胡公碑

君諱碩字季叡交趾都尉之孫太傅安樂侯之子也順
帝時為郎中桓帝時遭叔父憂以疾自免荊州將軍每
辟輒辭疾後以高等拜侍御史遷諫議大夫舉賢良方
正病不詣公車建寧元年七月拜陳畱太守病劇不任
應召詔使謁者劉惔即授印綬二十一日卒詔遣使者

王謙以中牢具祠特賜錢五萬布一百疋贈穀三十斛
儔類赴送遠近鱗集於時陳留主簿高吉蔡軫等咸以
郡選充備官屬來迎者三十四人奔驚跋涉願承清化
逢天之威不獲延祚痛心絕望忉怛永慕乃相與衰經
庭位號咷靈柩將寔申教脩儀疚在輿服寮御部引各
執其職路人感愴觀者歎息遂樹碑作銘以表令德銘
曰

於藐下國瞻仰俊乂欽見我君爰綏我惠式昭績恩有

勞其悴昊天不弔景命顛墜悠悠蒸黎惆悵喪氣政雖
未宣古之遺愛祁祁我君習習冠蓋修誠以迓曾不東
邁靈魂徘徊靡所瞻逮惟其傷矣胸肝摧碎勒銘告哀
傳千萬代

陳太丘碑

先生諱實字仲弓潁川許昌人也含元精之和應期運
之數兼資九德總修百行於鄉黨則恂恂焉斌斌焉善
誘善導仁而愛人使夫少長咸安懷之其為道也用行

舍藏進退可度不徼許以干時不遷貳以臨下四為郡
功曹五辟豫州六辟三府再辟大將軍宰聞喜半歲太
丘一年德務中庸教敦不肅政以禮成化行有謚會遭
黨事禁錮二十年樂天知命澹然自逸交不諂上愛不
黷下見幾而作不俟終日及文書赦宥時年已七十遂
隱丘山懸車告老四門備禮閑心靜居大將軍何公司
徒袁公前後招辟使人曉諭云欲特表便可入踐常伯
超補三事紆佩金紫光國垂勲先生曰絕望已久飾巾

待期而已皆遂不至弘農楊公東海陳公每在衮職羣僚賀之皆舉手曰潁川陳君命世絕倫大位未躋慚于文仲竊位之負故時人高其德重于公相之位也年八十有三中平三年八月丙子遭疾而終臨沒顧命留壻所卒時服素棺槨財周櫬喪事唯約用過乎儉羣公百僚莫不咨嗟巖藪知名失聲揮涕大將軍弔祠錫以嘉謚曰徵士陳君稟嶽瀆之精苞靈曜之純天不慙遺一老俾屏我王梁崩哲萎于時靡憲縉紳儒林論德謀績

謚曰文範先生傳曰郁郁乎文哉書曰洪範九疇彝倫攸叙文為德表範為士則存誨沒號不亦宜乎三公遣令史祭以中牢刺史敬弔太守南陽曹府君命官作誄曰赫矣陳君命世是生含光醇德為士作程資始既正守終有令奉禮終沒休矣清聲遺官屬掾吏前後赴會刊石作銘府丞與比縣會塋荀慈明韓元長等五百餘人總麻設位哀以送之遠近會塋千人以上河南尹种府君臨郡追歎功德述錄高行以為遠近鮮能及之重

部大掾以成斯銘可謂存榮沒哀死而不朽者也乃作
銘曰

我我崇嶽吐符降神於皇先生抱寶懷珍如何昊穹既
喪斯文微言圯絕來者曷聞交交黃鳥爰集于棘命不
可贖哀何有極

陳太丘廟碑

維中平五年春三月癸未豫州刺史典以褒功述德政
之大經是以作謚封墓興於周禮衛鼎晉銘其昭有實

故太丘長潁川許昌陳實字仲弓含聖哲之清和盡人
才之上美光明配于日月廣大資乎天地辟四府宰三
域神化著於民物形表圖於丹青巍巍乎其不可尚也
洋洋乎其不可測也儉約違時懸車致仕徵辟交至遂
不屑就春秋八十有三寢疾而終大將軍賜諡羣后建
碑國人立廟先生有二子季方元方皆命世希有繼期
特立季方盛年早亡亦圖容加諡元方在喪毀瘁消形
嘔血純孝過哀率禮不越于時嘉異畫像郡國欽盛德

之休明懿鐘鼎之碩義乃樹碑鐫石垂世寵光詞曰
於皇先生冠耀八荒闡德之宇探道之綱繼期立表以
訓四方惟亮天工羣生之望高明允實有馥其芳載德
奕世休有烈光欽慕在人舊有憲章過牧斯州庶奉清
塵棄予而邁靡瞻靡聞嗟哉懷矣曷所咨詢告哀金石
式昭其勤

文範先生陳仲弓碑

君諱實字仲弓潁川許人也其先出自有虞氏中葉當

周之盛德有媯滿者武王配以太姬而封諸太昊之墟
是為陳胡公春秋之末失其爵土遂以國氏焉世篤懿
德令聞不顯君膺皇靈之清和受明哲之上資憑先民
之遐迹秉玄妙之淑行投足而襲其軌施舍而合其量
夫其仁愛溫柔足以孕育羣生廣大寬裕足以包覆無
方剛毅強固足以威暴矯邪正身體化足以陶冶世心
先生有四德者故言斯可象靜斯可效是以邦之子弟
邇方後生莫不同情瞻仰由其模範從其趣尚戾很斯

和爭訟化讓雖嚴威猛政迫以刑戮未若先生潛導之
速也其立朝事上也恭順貞厲含章方直無顯諫以彰
直不割高而引長常幹州郡腹心之任義則進之以達
道否則退之以光操然後德立名宣蓋于當世辟司徒
府納規陳謀匡弼三事人用昭明台階允寧遷聞喜長
清風暢於所漸儉節溢於監司郡政有錯爭之不從即
解綬去復辟太尉府遷太丘長民之治情歛慾反於端
懿者猶草木之偃於翔風百卉之挺于春陽也以所執

不協所屬邑斯舉矣不俟終日辟大將軍府道之行廢
有分於命乃濯密網以就禁錮潛伏不試十有八年大
忌蠲除舉賢良方正大將軍司徒並辟君曰七十有懸
車之禮況我過諸遂不應其命容止法度老而彌壯凡
所履行事類博審不可勝數畧舉首目其實錄記在乎
其傳春秋八十有三中平三年八月丙子卒大將軍三
公使御屬往弔祠會葬作誄謚曰文範先生刺史太守
樹碑頌德許令以下至于國人立廟舊邑四時蒸嘗歡

哀承祀具如祖禰先生存獲重稱亡歆血食修行于已
得斯于人固上世之所罕有前哲之所不過也孤嗣紀
銜恤在疚敢錄言行終始所守乃有二三友生咨度禮
則咸曰君化道神速行于有國法施於民祀典所宗鄉
人之祠非此遺孤所得專也昔者先生甚樂茲土築室
講誨精靈所寧紀順奉雅意遂定兆域宜有銘勒表墳
墓俾後生之歌詠德音者如丘封之存斯也乃作銘曰
於熙文考天授弘造淵玄其深巍峩其高剛而無虐柔

而不撓誕鋪模憲示世作教君之誨矣民胥効矣道行
斯進廢乃斯止鮮我顯泰既多幽否舍榮取辱涅而不
緇德之休明賤不為耻超邈其猷莫與方軌

郭有道林宗碑

先生名泰字林宗太原界休人也其先出自有周王季
之穆有號叔者實有懿德文王咨焉建國命氏或謂之
郭即其後也先生誕膺天衷聰睿明哲孝友溫恭仁篤
慈惠夫其器量弘深姿度廣大浩浩焉汪汪焉與乎不

可測已若乃砥節勵行直道正辭貞固足以幹事隱括
足以矯時遂考覽六籍採綜圖緯周流華夏游集帝學
收文武之將墜拯微言之未絕于時纓綬之徒紳佩之
士望形表而景附聆嘉聲而響和者猶百川之歸巨海
鱗介之宗龜龍也爾乃潛隱衡門收朋勤誨童蒙賴焉
用祛其蔽州郡聞德虛已備禮莫之能致羣公休之遂
辟司徒掾又舉有道皆以疾辭將蹈洪崖之遐跡紹巢
由之絕軌翔區外以舒翼超天衢以高峙稟命不融享

年四十有三以建寧二年正月乙亥卒凡我四方同好之人永懷哀悼靡所置念乃相與推先生之德以圖不朽之事僉以為先民既沒而德音猶存者亦賴之于紀述也令其如何而闕斯禮于是建碑表墓昭銘景行俾芳烈奮乎百世令聞顯于無窮其詞曰

於休先生明德通玄純懿淑靈受之自天宗壯幽濬如山如淵禮樂是悅詩書是敦匪惟撫華乃尋厥根宮牆重仞允得其門懿乎其純確乎其操洋洋搢紳言觀其

高棲遲泌丘善誘能教赫赫三事幾行其招委辭召貢
保此清妙降年不永民斯悲悼爰勒茲銘摘其光耀嗟
爾來世是則是效

貞節先生范史雲碑

先生諱丹字史雲陳畱外黃人陶唐氏之後也其在周
室有士會者為晉大夫以受范邑遂以為氏漢文景之
際爰自南陽來家于成安生惠延熹二年官至司農廷
尉君則其後也君受天正性志高行潔在乎幼弱固已

藐然有烈節矣時人未之或知屈為縣吏亟從仕進非其好也退不可得乃託死遁去親戚莫知其謀遂隱竄山中涉五經覽書傳尤篤易與尚書學立道通久而後歸遊集太學知人審友苟非其類無所容納介操所在不顧貴賤其鄉黨也事長惟敬養稚惟愛言行舉動斯為楷式郡縣請召未嘗屈節其有備禮招延虛已迂止亦為謀奏盡其忠直以處士舉存廉除郎中萊蕪長朶出京師喪母行服故事服闋後還郎中君遂不從州

郡之政凡其事君過則弼之闕則補之通清夷之路塞
邪枉之門舉善不拘階次黜惡不畏強禦其事繁多不
可詳載雅性謙儉體勤能苦不樂假借與從事荷負徒
行人不堪勞君不勝其逸辟太尉府俄而冠帶或以羣
黨見嫉時政用受禁錮君罹其罪閉門靜居九族中表
莫見其面晚節禁寬困于屢空而性多檢括不治產業
以為卜筮之術得因吉凶道治民情以受薄償且無咎
累乃鬻卦于梁宋之域好事者覺之應時輒去禁既蠲

除太尉張公司徒崔公前後四辟皆不就仕不為祿故
不牽於位謀不苟合故特立于時是則君之所以立節
明行亦其所以後時失途也年七十有四中平二年四
月卒太尉張公兗州劉君陳畱太守淳于君外黃令劉
君僉有休命使諸儒叅按典禮作誄著謚曰貞節先生
昭其功行錄記所履謀于耆舊刊石樹銘光示來世銘
曰

於顯貞節天授懿度誕茲明哲允迪德譽如淵之清如

玉之素溷之不濁涅之不汙用行思忠舍藏思固伯夷
是師史鮪是慕榮貧安樂不恡窮迂甘死善道遺名之
故身沒譽存休聲載路

彭城姜伯淮碑

先生諱肱字伯淮彭城廣戚人也其先出自帝胄在皇
唐蓋與四岳共業能禮于神舜命秩宗爰封于呂其裔
呂望佐周克殷俾侯齊國姓有姜氏即其後也高祖祖
父皆豫章太守潁陰令先生既蹈先世之純德體英妙

之高姿立性純固百行修備故其平生所能事親惟存
如大舜五十而慕友于兄弟有棠棣之華萼韡之度體
惠理和有上德之素安靜守約恩及嬰兒至操動信邑
中化之外戶不閉治藏無隱及其學而知之者三墳五
典八索九丘俯仰占候推步陰陽有名物定事之能獨
見先覩之効然猶學而不厭誨人不倦童冠自遠方而
集者蓋千餘人夫水盈而流德交而形是故德行外著
洪聲遠布華夏同稱名振當世凡十辟公府九舉賢良

方正公車特徵玄纁禮聘又家拜犍為太守大中大夫先生盤桓育德莫之肯就不隕穫于貧賤不充詘于富貴拔乎其萃出乎其類生民之傑也年七十有七熹平二年四月辛巳卒于是從遊弟子陳留申屠蟠等悲悼傷懷懼微言之欲絕感絕倫之盛事乃建碑于墓甄述景行銘曰

邈矣先生應天淑靈孝友是備上德是經弘此文藝耽怡是寧恂恂善誘童冠來誠有燿其譽有煥其聲顯顯羣公並加辟命赫赫聖皇仍獲其聘委策避國守此玄

靜綽乎其裕確乎其操疇昔洪崖雙名並高嗟乎殞沒

搢紳永悼依依我徒靡則靡效勒銘金石彌遠益曜

舊本

蔡中郎集載伯淮碑誤書建安二年卒宋人謂邕建安前已先逝因疑此碑為偽不知後漢書伯淮之沒蓋熹平二年也在邕為先輩大儒此碑實出邕筆今改正建安二字為熹平可耳

翟先生碑

世以仁義為質學問為業爰暨先生固天縱德應運立
言繼期五百實行形于州里明哲與聖合契該通五經
兼洞墳籍為萬里之場圃九隩之林澤挹之若江湖仰

之若華岳玄馬測之則無源汪馬酌之則不竭可
謂生民之英者已國失元傳學失表式凡百措紳哀矣
泣血人百其身匪云來復于是鄉黨乃相與登山伐石
而勒銘曰

邈矣先生厥德孔貞腹心弘道深高入神王錫三命觀
國之賓其視富貴忽若浮雲既不降志亦不辱身

汝南周巨勝碑

君諱勰字巨勝陳畱太守之孫光祿勳之子也君應坤

乾之淳靈繼命世之期運玄懿清朗貞厲精粹體仁足以長人嘉德足以合禮總六經之要括河洛之幾援天心以立鈞贊幽明以揆時沉靜微密淪于無內寬裕弘博含乎無外巨細洪纖罔不總也是以實繁于華德盈乎譽初以父任拜郎中疾去官察存廉是時郡守梁氏外戚貴寵非其好也遂以病辭太守復察存廉乃俯而就之以明可否然猶私存衡門講誨之樂不屑已也又倭之而旋故大將軍梁冀專國作威海內從風世之雄

材優逸之徒莫不委質從命而顛覆者蓋亦多矣聞君
洪名前後三辟卒不降身由是搢紳歸高羣公事德太
尉司徒再辟三辟察賢良方正州舉孝廉皆病不就授
攘之際災青仍發聖上詢諮師錫策命公車特徵君仰
瞻天象俯察人事世路多險進非其時乃托疾杜門靜
居里巷外無人跡庭生蓬蒿如此者十餘年強禦不能
奪其守王爵不能滑其慮至延熹二年乃更闢門延賓
享宴娛樂及秋而梁氏誅滅十二月君卒然則識幾知

命可觀於斯矣洋洋乎若德雖崇山千仞重淵百尺未
足以喻其高究其深也夫三精垂耀處者有表爰在上
世作者七人焉有該百行備九德齊光日月洞靈神明
如君之至者與亶所謂天明之秀也享年五十不登期
考遐邇歎悼痛心失圖乃相與建碑勒銘以旌休美其
辭曰

厥初生民天賜之性有龐有醇有否有聖伊惟周君允
卜其政誕茲明德自貽哲命煥乎其文如星之布確乎

不拔如山之固追踪先緒應期作度潛心大猷覃思德
謨遁世無悶屢辭王寮洋洋泌丘于以逍遙茂爾童蒙
是訓是教瞻彼榮寵譬諸雲霄優哉游哉侔此弘高名
振華夏光耀昆苗清風丕揚德音孔昭

處士園叔則碑

伊漢二十有一世處士有園典字叔則者夫其生也天
真淑性清理條暢精微周密包括道要致思無形溪總
厯部纖入藝文藻分葩列如春之榮守根據窮不虛其

聲偉德若茲惟世之英乃遂隱身高藪稼穡孔勤童蒙
來求彪之用文不義富貴譬諸浮雲州郡禮招休命交
集徒加名位而已莫之能起也博士徵舉至辱恥已處
而復出若有初而無終潔耿介于丘園慕七人之遺風
年七十有五建寧二年六月卒臨沒顧命曰知我者其
蔡邕乃為銘載書休美俾來世昆裔永有諷誦于先生
之德其辭曰

民之齊敏卓時挺生思心精叡綜物通靈術有玄妙于

時游情聞道睹異惕然若驚守死善操與世無營渾其
若濁徐然後清綽其若煥終其益貞有恒實難獨秉其
經嗟爾來世是瞻是聽

光武濟陽宮碑

惟漢再受命曰世祖先光武皇帝考南頓君初為濟陽令
濟陽有武帝行過宮常封閉帝將生考以令舍下濕開
宮後殿居之建平元年十二月甲子夜帝生時有赤光
室中皆明使卜者王長卜之長曰此善事不可言歲有

嘉禾一莖生九穗長于凡禾因為尊諱王室中微哀平
短祚姦臣王莽偷有神噐十有八年罪盈惡熟天人致
誅帝乃龍見白水淵躍昆蚡破前隊之衆殄二公之師
收兵畧地經營河朔戮力戎功翼戴更始義不即命帝
位闕焉於是羣公諸將據河洛之文叶符瑞之珍僉曰
厯數在帝踐祚允宜乃以建武元年六月乙未即位鄩
縣之陽五成之陌祀漢配天不失舊物享國三十六年
方內乂安蠻夷率服巡狩泰山禪梁父皇代之遐迹帝

者之上儀罔不畢舉道德餘慶延于無窮先民有言樂
樂其所自生而禮不忘其本是以虞稱媯汭姬美周原
皇天乃眷神宮實始于此厥跡邈哉所謂神麗顯融越
不可尚小臣河南尹鞏瑋先祖銀艾封侯歷世卿尹受
漢厚恩瑋以商箕餘烈郡舉孝廉為大官丞來在濟陽
顧見神宮追惟桑梓褒述之義用敢作頌頌曰

赫矣炎光爰耀其輝篤生聖皇貳漢之徵稽虔虔則誕
育靈姿黃孽作慝纂握天機帝赫斯怒爰整其師應期

潛見扶陽而飛禍亂克定羣凶殄夷匡復帝載萬國以
綏巡于四嶽展義省方登封降禪升于中皇爰茲初基
天命孔彰子子孫孫保之無疆

王子喬碑

王孫子喬者蓋上世之真人也聞其僊舊矣不知興于
何代博問道家或言潁川或言彥蒙初建斯域則具斯
丘傳承先人曰王氏墓紹胤不繼荒而不祠歷載彌年
莫之能紀暨于永和元年十有二月當臘之夜上有哭

聲其音甚哀附居者往聞而恠之明則登其墓察焉時
天洪雪下無人踪見一大鳥跡有祭祀之處左右或以
為神其後有人着絳冠大衣杖竹策立冢前呼樵孺子
尹禿謂曰我王子喬也爾勿復取吾先人墓前樹也須
臾忽然不見時令太山萬熙稽古老之言感精瑞之應
咨訪其驗信而有徵乃造靈廟以休厥神於是好道之
傳自遠來集或絃歌以詠太一或談思以歷丹田其疾
病疴瘵者靜躬祈福即獲祚若不虔恪輒顛踣故知至

德之宅兆真人之先祖也延熹八年秋八月皇帝遣使者奉犧牲以致祀祇懼之敬肅如也相國東萊王章字伯義以為神聖所興必有銘表昭示後世是以賴鄉仰伯陽之踪闔民慕尹喜之風乃會長史邊乾訪及士隸遂樹玄石紀遺烈俾志道者有所覽焉詞曰

伊王君德通靈含光耀秉純貞應大道美久榮棄世俗飛神形翔雲霄浮太清乘螭龍載鶴軒戴華笠奮金齡揮羽旗曳霓旌懽罔極壽億齡昭篤孝念所生歲終閔

發丹情存墓冢舒哀聲遺鳥跡覺舊城被絳衣垂紫纓
呼孺子告姓名由此悟感怖驚修祠宇反几筵饋饌進
甘香陳時傾顧聲明裡匡流祉熙帝庭祐邦國相黔民
光景福耀無垠

伯夷叔齊碑

熹平五年天下大旱禱請名山求獲答應時處士平陽
蘓騰字玄成夢陟首陽有神馬之使在道明覺而思之
以其夢陟狀上聞天子開三府請雨使者與郡縣戶曹

掾吏登山升祠手書要曰君況我聖主以洪澤之福天
尋興雲即降甘雨因樹碑為銘曰

惟君之質體清良分昔佐殷姬忠孝彰兮委國捐爵諫
國亡兮譏武伐紂欲喻匡兮時不可救歷運蒼兮追念
先侯受命皇兮憂懷感兮雖沒不朽名字芳兮

九疑山碑

巖巖九疑峻極于天觸石膚合興播連雲時風嘉雨浸
潤下民芒芒南土實賴厥勛逮于虞舜聖德光明克諧

頑傲以孝蒸蒸師錫帝世堯乃授徵受終文祖璇璣是
承泰階以平人以有終遂葬九疑解體而升登此崔嵬
託靈神仙

陳留東昏庫上里社碑

社祀之建尚矣昔在聖帝有五行之官而共工子勾龍
為后土及其沒也遂為社祀故曰社者土地之主也周
禮建為社位左宗廟右社稷戎醜攸行於是受脤土膏
恒動於是祈農又頒之于兆民春秋之中命之供祠故

自有國至于黎庶莫不祀焉惟斯庫里古陽武之戶牖鄉也春秋時有子華為秦相漢興陳平由此社宰遂佐高帝克定天下為右丞相封曲逆侯永平之世虞延為太尉司空封公至延熹中延弟曾孫放字子卿為尚書令外戚梁冀乘寵作亂首策誅之王室以績封召都亭侯太僕太常司空毗天子而維四方克措其功往烈有常于是司監爰暨邦人僉以為宰相繼踵咸出斯里秦一漢三而虞氏世焉雖有積善餘慶修身之致亦斯

社之所相也乃相與樹碑作頌以示後昆云

唯王建祀明事百神乃顧斯社于我兆民明德惟馨其
慶聿彰自嬴及漢四輔代昌爰我虞宗乃世重光元勲
既立錫茲土疆乃公乃侯帝載用康神人協祚且巨且
長凡我里人盡受嘉祥刊銘金石永世不忘

瑯琊王傳蔡公碑

君諱朗字仲明益倉頡之精胤姒稷之末胄也昔叔度
文王之昭建侯于蔡以國氏焉迄于平襄周祚微缺王

室遂卑齊晉交爭強楚侵陵昭侯徙于州來公族分遷
氏家于圉奕葉載德常歷官尹以逮于茲君雅操明允
威厲不猛履孝悌之性懷文藝之才包洞典籍刊摘沉
秘知幾達要通含神契既討三五之術又采二南之業
以魯討教授生徒雲集莫不自遠並至栖遲不易其志
簞食曲肱不改其樂心棲清虛之域行在玉石之間是
以德行儒林智周當代四岳稱名帝曰予聞元和元年
徵拜博士舒演與秘贊理闕文所立卓爾度躡雲蹤其

選士也抑頑錯枉進聖擢偉極遺逸於九臯揚明德于側陋拔茅以彙幽滯用濟加以清敏廣平好是正直規誨之策日諫王庭忠謹著烈令聞流行聖朝以藩國貴胄先帝遺體或以繼絕襲位正于阿保未洽雅訓驕盈僭差或蹈憲理非弘直碩儒莫能匡弼蔡君審行修德進退可度遷河間中尉瑯琊王傳乃從經術之方示以棐諶之威率禮莫違其國用靖雖安國之輔梁孝仲舒之相江都靡以加焉勲績既盛帝簡其功將授上位遷

于紫宮賦壽不永遘此疾凶年五十八永興六年夏卒
嗚呼哀哉凡百君子咨痛罔極殷懷傷悼含涕流惻如
何昊天喪我師則爰勒斯銘式昭其德

天敏明哲於赫我君含弘光大玄覽孔真潛樂教思韞
玉衡門雲龍感應養徒三千珠藏外耀鶴鳴聞天若時
徵庸登祚王臣綜彼前疑定此典文參佐七德俾相大
藩身沒稱顯永遺令勲表行揚名垂示後昆

玄文先生李子材碑

玄文先生名休字子材南陽宛人也其祖李伯陽周柱
下史覲衰世而遁焉其後雄俊豪傑往往崛起自戰國
及漢名臣繼踵支胄散逸其遷于宛尚矣王莽竊位漢
祚中移考翼佐世祖匡復郊廟錫封茅土卿相牧守于
時相逐休少以好學游心典謨既宗七經又精羣經鈞
深極奧窮覽妙旨居則玩其辭動則察其變雲物不顯
必考其占故能獨見前識以先神意若古今常難疑義
錯繆前人所希論後學所不覽休盡剖判剝散幽暗靡

不昭爛猶發憤于目所不覩體所不閑遂登東岳觀百
王遺風習容闕里以協禮衷退而講誨童冠仰焉傳傳
如也郡署五官掾功曹司空胡公顯以儒譽特進大鴻
臚仍優禮固請東讓執虛辭此三命不為利回不為義
疚臨寵審已不動其守可謂純潔皓素綽有餘裕者已
其於鄉黨細行敦睦九族篤信交友不可得而詳也初
娶配出後配未字年既五十苗胤不嗣以永壽二年夏
五月乙未卒凡其親昭朋徒相與大會而葬之鼎俎之

禮節文曲備時令戴君臨喪命謚郡遣丞掾冠蓋咸屆
既定而後罷焉于是故好朋舊僉以仲尼既沒文不在
茲韞積美玉喪莫賈之求而無繼懷爾永思乃刊斯石
懿德是不

吁茲先生秉德恭勤天啟哲心其學孔純經緯是綜雅麗是
分行已守道匪禮不遵處約不戚聞寵不欣榮不能華威不
能震天淑厥命以讓以仁有惠云載惟邦之珍按典考謚謚
以立文身沒名彰配黔作隣遺譽罔極丕昭億年嗚呼哀哉

郡掾史張玄祠堂碑

掾諱玄字伯雅河南偃師人也其先張仲者實以孝友
為名左右周室大漢初興張蒼為丞相封北平侯其後
自河內遷于茲土世為顯姓掾天安恭恪宣慈惠和允
恭博敏惻隱仁恕正身履道以協閭庭損用節財以贍
疏族動中規矩言合典式不知名彰不飾行著可謂仁
粹淑貞自然之素者已論者嘉之州郡禮招署致掾史
沉静寡欲不求榮祿是以豐于天爵薄于人位某月日

遭疾而卒掾孫翻以貞固之質受過庭之訓獲執戟出
宰相邑遷太守得大夫之祿奉烝嘗之祀尋原祚之所
由而至于此先考積善之餘慶陰德之陽報乃于是立
祠堂假碑勒銘式明令德以示乎後辭曰

於惟我考允迪懿德治信斯順其儀不忒仁惠周洽行
惟模則篤垂餘慶貽此燕翼邈矣遺孫周懷多福刊名
金石流于罔極

袁滿來墓碑

茂德休行曰袁滿來太尉公之孫司徒公之子逸才淑
姿實天所授聰遠通敏越亂在闕明習易學從誨如流
百家衆氏遇目能識事不再舉問一及三具始知終情
性周備夙有奇節孝智所生順而不驕篤友兄弟和而
無忿氣決泉達無所凝滯雖冠帶之中士校材考行無
以加焉允公族之殊異國家之輔佐衆律其器士嘉其
良雖則童稚令聞芬芳降生不永年十有五四月壬寅
遭疾而卒既苗而不穗凋殞華英嗚呼悲夫乃假碑旌

于墓表嗟其傷矣唯以告哀

童幼胡根碑

故陳留太守胡君子曰根字仲原生有家表幼而克才
角犀豐盈光潤玉顏聰明敏惠好問早識言語所及智
思所生雖成人之德無以加焉稟命不長夙罹凶災年
七歲建寧二年遭疾夭逝慈母悼痛昆弟孔懷感襁褓
之親愛憐國城之乖離乃權宜就封二祖墓側親屬李
陶等相與追慕先君悲悼遺嗣樹碑刊辭以慰哀思辭

曰

於惟中原應氣淑靈實有令儀而氣如瑩明之之性與
體俱生聞言斯識覩物知名傳者太勤受誨則成柔
和順美與人靡爭忿不怨懟喜不驕盈當受福永為光
榮如何昊天降此短齡惜繁華之方曄兮望嚴霜而凋
零嗟童孺之夭逝兮傷慈母之肝情從皇祖乎靈兆兮
庶神魄之斯寧哀慘戚以流涕兮念汚軫之不停顧永
懷于不朽兮乃託辭于斯銘

真定直父碑

其接友也審辨真偽明于知人度終始而後交情不踈而貌親

靈表

太傅胡公夫人靈表

夫人編縣舊族章氏之長女也字曰顯章令儀小心秉操塞淵仁孝婉順率禮無遺體季蘭之姿蹈思齊之跡永初二年年十有五爰初來嫁誕成家道仰奉慈姑竭

歡致敬俯誨膝下化導周悉至德修於幾微德音暢于
神明故能叅任姒之功兼生人之榮朝春路寢贊桑蠶
宮光寵有祭祭服有琬前後奉斯禮者三十餘載夫人
生五男長曰整伯齊次曰千億叔韡次曰寧穉威次曰
碩季叡伯仲各未加冠遭厲氣同時夭折叔上郡孝廉
季更歷州郡舉茂才葉令京令為議郎季以高第為侍
御史諫議大夫侍中虎賁中郎將陳留太守皆早即世
夫人哀悼劬悴由是被疾遭太夫人憂篤年七十七建

寧三年薨夫人之存也契濶中饋婉孌供養依生奉仁
紹述雅意其閨月附于太夫人窀穸于茲地魂而有靈
欽明定省神心欣焉其實寧之元女金盈追慕永思惜
怛罔極遂及斯表鐫著堅珉頌曰

悲母氏之不永懷殷恤以摧傷惟子道之無窮惜聞誨之
未央庶黃耆以期頤胡委我以夙喪恒思心以澉切亦割
肝以絕腸昔先聖之遺辭言仁者其壽長嗟母氏之憂患
體愷悌以慈良失延年之報祐獨何棄於穹蒼日月忽以

將暮抱長結以含愁尋修念於在昔原疾病之所由遭元
子之弱天心傷悴以自憂暨叔季之殞終哀情結以彌綢
皇姑沒而中感遂大漸兮速流疾醎醎而日邁氣微微以
長浮銷精魂以遐翔曾不可乎援留爾乃順缺旨於冥冥
繼存意於不違爰附靈於皇姑尚魂魄之有依潛幽室
之黯漠惜昭明之景輝一往超以未及傾徂邈其彌遲
顧新廟以累歎伏几筵而增悲嗟既逝之益遠耿悠悠
而莫追

司徒袁公夫人馬氏靈表

維光和七年司徒袁公夫人馬氏薨其十一月癸亥子懿達仁達銜恤哀痛靡所寫懷乃撰錄母氏之德履示公之門人覩文感義采石于南山諮之羣儒假貞石以書焉夫人右扶風平陵人也曾祖中水侯祖將作大匠考南郡太守中水侯弟伏波將軍女在淑媛作合孝明誕生孝章婚姻帝室世為名族夫人生應靈和德精性妙角犀豐盈實有偉表溫慈惠愛慎而寡言幼從師氏

四禮之教早達窈窕德象之儀及笄求匹明哲供治婦
業孝敬婉孌畢力中饋後生仰則以為模憲自公歷據
王官至宰相夫人營克家道扶翼政事聰明達乎中外
隱括及乎無方不出其機化導宣暢童子無驕逸之尤
婦妾無捨力之愆故能窮生人之光寵獲福祿之豐報
朝春政於王室躬桑繭於蠶宮春秋六十有三寢疾不
永懿等追想定省尋思髣髴哀窮念極不知所裁乃申

辭曰

於穆母氏其德孔休思齊先姑百行聿修宣慈惠和恩
澤並周義方之訓如川之流俾我小子蒙昧以澆不享
遐年以永春秋往而不返潛淪大幽嗚呼哀哉几筵虛
設幃帳空陳品物猶在不見其人魂氣飄飄焉所安神
兄弟何依姊妹何親號咷忉怛曾不我聞吁嗟上天何
辜而然傷逝不續往者不旋

誄

濟北相崔君夫人誄

維延熹四年故濟北相崔夫人卒嗚呼哀哉世喪母儀
宗殞憲師哀哀孝子靡所瞻依凡百赴弔至止增悲投
涕歔歔共叙赫姿乃為誄曰

清和有鑠時惟哲母令儀令色爰以資始塞淵其心淑
慎其止于母斯勤在子斯敏仰覽篇籍俯釐絲枲多才
多藝于何不有休譽邈焉允女之英乃及崔君惟德是
行其德伊何實粹實明虔恭事幾契閨中饋敦此婉順
疾彼攸遂思齊徽音晨興夜寢穆穆其猷莫之與二天

祚明德底之方穀於赫崔君膺茲祉祿夫人有肩翼此
清淑仁風溫潤義惠優渥推恩中外施浹族食不兼
膳服不織縠以儉為榮以奢為辱堂堂其肩惟世之良
於其令母受茲義方訓以柔和董以嚴剛恕不傷愛喜
不亂莊納之軌度終然允臧是用登隣享其寵光雖則
宗盛猶匪寧息同其婦子茂帥其職服貴無荒尊不舍
力密勿不忘惟德之極昔在共姜陪臣之母勞謙紡績
仲尼是紀矧茲夫人帝室命婦猶日孜孜復禮克己人

亦有言仁者壽長宜登永年黃耆無疆昊天不弔降此
殘殃寢疾彌留精爽悴傷慘怛孝子惴惴其惶靡神不
舉無藥不將嗚呼哀哉於是孝子長叫氣絕復蘇號呼
告哀不知其辜昊天上帝忍弔遺孤尋想遊靈馬識所
徂嗚呼哀哉既殯神柩薄言于歸家宰喪儀循禮無遺
切切喪主瘠羸哀哀情兮長慕涕兮無晞行旅揮涕千
里于咨乃謀卜筮言考其良建彼兆域于時翳藏冥冥
窈窕無時有陽燈燭既滅馬道納光形景不見定省何

望嗟其哀矣不可弭忘日月代序古有如喪由斯夫人
榮烈有章配彼哲彥既隆且昌顧景赫奕饋供孔將惟
以慰懷庶無永傷嗚呼哀哉

神誥

漢交趾都尉胡公夫人黃氏神誥

夫人江陵黃氏之季女字曰列羸其先出自伯翳別封
于黃以國氏焉高祖父汝南太守曾祖父延城大尹祖
父番禺令父以主簿嘗證太守事奉明君以立臣節漢

南之士以為美談初都尉君娶于故豫州刺史即黃君之姊生太傅安樂侯廣及卷令康而卒繼室以夫人生童紀未齠而夭夫人懷聖善之姿韜慈母之仁撫育二孤導以義方思齊先姑神罔時恫故能迄用有成誕膺繁祉廣歷五卿七公再封之祿康亦由孝廉宰牧二城九鼎之義夫人是享爰暨稚孫更仕三宮或典百里或作虎臣銀艾貂蟬近侍顯尊受茲介福于我夫人自郡尉仕于京師及廣兄弟式叙漢朝夫人居京師六十有

餘載其乘輅執贄朝皇后採桑桑于蠶宮手三盆于蘭館者蓋三十年上有帝室寵光之休下有堂宇斤斤之祚心耽其榮體安其遠圖長慮迥用遺舊居欲畱此焉康寧之時亟以為言太夫人年九十一建寧二年薨于太傅府是月辛酉公之季子陳畱太守碩卒于洛陽左池里舍公銜哀悼祇慎其屬遵奉遺意不敢失墜乃俾元孫顯咨度羣儒以考其秉僉曰昔帝舜沒于蒼梧殞于虞郊二妃薨于江湘不即兆于九疑延陵季子實惟

吳人長子道終卜葬羸博夫遭時而制不遠遷徙魂氣
所之不繫丘壠帝舜以之神罔時怨季札以之仲尼嘉
焉鑒帝籍之高論綜精靈之幽情稽先人之遐迹順母
氏之所寧茲事體通而義同允不可替於是公乃為辭
昭告先考然後卜定宅兆龜筮悉從遂營窀穸之事舉
封樹之禮十月既望粵翌日巳酉葬我夫人黃氏及陳
畱太守碩于此高原維陽東界關亭之阿天子使中常
侍謁者李納弔且送葬持賻錢二十萬布二百疋再以

中牢祠羣后畢會榮哀孔備于時濟陽故吏舊民中常
侍勾陽于肅等二十三人思應慕化推本議銘著斯碑
石俾諸昆裔瞻仰以知禮之用是為神誥乃申頌曰
於穆夫人家邦之媛昔在嬴代黃國氏建至于近祖亦
降于漢天祚明德福祿流衍既作母儀履信思順登壽
耄耄用永蕃嬖子孫以仁追稽先典厝茲洛濱齊跡湘
靈配名古人休矣耀光千億斯年

哀讚

議郎胡公夫人哀讚

議郎夫人趙氏字曰永姜允有令德秉心塞淵舒詳閒雅儀節孔備女師四典窈窕德象罔不習熟以供婦道議郎早世檢誨幼孤義方以導其性中禁以閑其情孤顯儉節用免咎悔少辟侍中襲先公之爵以議郎出為濟陰太守是時夫人寢疾未薨而國家方有滎陽寇賊震驚帝師簡選州辟授任進衛不得辭王命親醫藥夫人乃自矜精稟氣力俛起若愈以勸遣顯到官月餘所

疾暴盛春秋五十八中平四年薨于京師穎有剖符之
寄偏于國典疾篤不得顧親增感氣絕不能自宥慎終
之事闕焉永廢雖不毀以隨沒亦困悴而傷懷知我如
此不如勿生號咷告哀以乞骸骨踰年然後獲聽追惟
考君存時之命迎棺舊土同穴此城孤心推割靡所底
念仰瞻二親或有神誥靈表之文敢曰亮闇叙我憂痛
作哀讚書之于碑

愍予小子夙罹孔艱嚴考殞沒我在齠年母氏鞠育載

於載憐殷斯勤斯慈愛備存匪惟驕之範我軌度教誨
嚴肅昭示好惡俾我克類畏威忌怒用免咎悔踐繼先
祖卽壽其土二將是臨與帝剖符守于濟陰夫人寢疾
榮此寵休疾用歡痊翊日斯瘳將征將邁從養陶丘景
命徂逝不慙少畱疾大漸以危亟兮精微微而浸衰逼
王職於憲典兮子孫忽以替違目不臨此氣絕兮手不
親夫含飯陳衣衾而不省兮合綆棺而不見昔予考之
卽世兮安宅兆于舊邦依存意以奉亡兮遷靈柩而同

來考妣痛以慘兮離乖神柩集而移兮增哀黃壚密而
無間兮出入間其無門昇柩在茲兮不知魂景之所存
悼孤衷之不遂兮思情懔以傷肝幽情淪于后坤兮精
哀達乎昊乾

祝辭

宗廟祝嘏辭

嗣曾孫皇帝某敢昭告于皇祖高皇帝各以后配昔受
命京師都于長安享國十有一世歷年二百一十載遭

王莽之亂宗廟隳壞世祖復帝祚遷都洛陽以服土中
享國一十一世歷年一百六十五載予末小子遭家不
造早統洪業奉嗣無疆關東吏民敢行稱亂總連州縣
擁兵聚衆以圖叛逆震驚王師命將征服股肱大臣推
皇天之命以已行之事遷都舊京昔周德缺而斯干作
應運變通自古有之於是乃以三月丁亥來自維越三
月丁巳至于長安飭躬不慎寢疾旬日賴祖宗之靈以
獲有瘳吉旦齊宿敢用潔牲一元大武柔毛剛鬣商祭

明視薌合嘉蔬香其醎醑豐本明粢醴酒用告遷來尚饗

九祝辭

高皇帝使工祝承致多福無疆于爾嗣曾孫皇帝使爾受祿于天宜此舊都萬國和同兆民康乂眉壽萬年子子孫孫永守民庶勿替引之

祝社文

元正令午時惟嘉良乾坤交泰太簇運陽乃祀社靈以

祈福祥

祖餞祝文

今歲淑月日吉時良典應孔加君當遷行神龜吉兆林
氣煌煌著卦利貞天見三光鸞鳴雍雍四牡彭彭君既
升輿道路開張風伯雨師洒道中央陽遂求福蚩尤辟
兵倉龍夾轂白虎扶行朱雀道引玄武作侶勾陳居中
厭伏四方徃臨邦國長樂無疆

楔文

洋洋暮春厥日除已尊卑煙驚惟女與士自求百福在
洛之溪

弔文

弔屈原文

鶉鴂軒翥鸞鳳挫翮啄碎琬琰寶其瓊瓠皇車奔而失
轄執轡忽而不顧卒壞覆而不振顧抱石其何補

文

篆勢

字畫之始因於鳥跡蒼頡循聖作則制文體有六篆巧
妙入神或象龜文或比龍鱗紆體放尾長翅短身頽若
黍稷之垂穎蘊若蟲蛇之棼縕揚波振擊鷹峙鳥震延
頸脅翼勢欲凌雲或輕舉內投微本濃末若絕若連似
露緣絲凝垂下端從者如懸衡者如編抄者邪趣不方
不圓若行若飛岐岐翾音喧小飛貌翾遠而望之若鴻鵠羣
遊絡繹遷延迫而視之湍際不可得見指揮不可勝原
研柔不能數其詰屈離婁不能覩其隙間般倕揖讓而

辭巧籀誦拱手而韜翰處篇籍之首目粲粲彬彬其可
觀摘華豔於紈素為學藝之範開嘉文德之弘懿蘊作
者之莫刊思字體之俯仰舉大畧而論旃古文苑起句
云鳥遺跡皇
頡頏聖作則制斯文體有六篆為真形要
妙巧入神或龜文斜列櫛比龍鱗餘同

隸勢

鳥跡之變乃惟佐隸蠲彼繁文崇此簡易厥用既行體
象有度魚若星陣鬱若雲布其大徑尋細不容髮隨事
從宜靡有常制或穹窿恢廓或櫛比鍼列或砥繩平直

或蜿蜒繆戾或長邪角趣或規旋矩折修短相副異體
同勢奮華輕舉離而不絕纖波濃點錯落其間若鍾簴
設張庭燎飛煙斬崑崔嵬高下屬連似崇臺重宇層雲
冠山遠而望之若飛龍在天近而察之心亂目眩竒姿
譎誕不可勝原研桑所不能計宰賜所不能言何草篆
之足算而斯文之未宣豈體大之難覩將秘奧之不傳
聊佇思而詳觀舉大畧而論旃

九惟文

八惟困之憂心殷殷天之生我星宿值貧六極之厄獨
遭斯勤居處浮漚無以自存冬日栗栗上下同雲無衣
無褐何以自溫六月徂暑炎赫來臻無絺無綌何以蔽
身無食不飽永離歡欣

詩

飲馬長城窟行

青青河邊草綿綿思遠道遠道不可思宿昔夢見之夢
見在我旁忽覺在他鄉他鄉各異縣展轉不可見枯桑

知天風海水知天寒入門各自媚誰肯相為言客從遠
方來遺我雙鯉魚呼童烹鯉魚中有尺素書長跪讀素
書書中竟何如上有加餐食下有長相憶

答對元式詩

伊余有行爰戾茲邦先進博學同類率從濟濟羣彥如
雲如龍君子博文貽我德音辭之集矣穆如清風

答卜元嗣詩

斌斌碩人貽我以文辱此休辭非余所希敢不酬答賦

誦以歸


翠鳥

庭陬

一作前

有若樛綠葉含丹榮翠鳥時來集振翼脩形

容回顧生碧色動搖揚標青幸脫虞人機得親君子庭
馴心托君素雌雄保百齡



漢魏六朝百三家集卷十九